

三
國
志
注
補

三國志注補卷一

魏書

武帝紀第一

太祖武皇帝

史通稱謂篇云降及曹氏祖名多濫必無慙德其惟武王故
陳壽國志呼武曰祖至於文明但稱帝而已

沛國譙人也

司馬彪續郡國志沛國譙刺史治劉昭補注云平陽邑一清
案曹參封河東平陽其後紹封食邑於沛之譙故曰譙平陽
邑也

注太祖一名吉利小字阿瞞

太平御覽卷九十三引魏志注太祖上有曹瞞傳曰四字今本脫

注王沈魏書曰

隋書經籍志魏書四十八卷晉司空王沈撰

注漢高祖之起曹參以功封平陽侯世襲爵土絕而復紹至今適嗣國於容城

前漢書功臣表曹參傳哀帝時封參玄孫之孫本始爲平陽侯王莽時薨子宏嗣建武中先降河北封平陽侯子曠嗣免後漢書和帝紀永元三年詔曰曹相國後容城侯無嗣須景風紹封一清案紹封之侯蓋仍平陽舊號而食邑於譙其後

復續遂改號容城也容城屬涿郡

桓帝世曹騰爲中常侍大長秋封費亭侯

水經淮水注渙水又東南逕費亭南漢建和元年封中常侍
沛國曹騰爲侯國續郡國志補注帝王世紀曰曹騰封費亭
侯鄴縣有費亭是也後漢書梁商傳永和四年中常侍張達
薨政內者令石光尙方令傅福宄從僕射杜永連謀其諧商
及中常侍曹騰孟賁云欲徵諸王子圖議廢立請收商等案
罪帝曰大將軍父子我所親騰賁我所愛必無是但汝曹共
妒之耳達等知言不用懼迫遂出矯詔收縛騰賁於省中帝
聞震怒敕宦者李歛急呼騰賁釋之收達等悉伏誅續五行
志曰光和元年五月壬午何人白衣欲入德陽門辭我梁伯

夏教我上殿爲天子中黃門桓賢等呼門吏僕射欲收縛何人吏未到須臾還走求索不得不知姓名時蔡邕以成帝時男子王褒絳衣入宮上前殿非常室曰天帝令我居此後王莽篡位今此與成帝時相似而有異被服不同又未入雲龍門而覺稱梁伯夏皆輕於言以往況今將有狂狹之人欲爲王氏之謀其事不成其後張角稱黃天作亂竟破壞劉昭注引風俗通曰光和四年四月南宮中黃門寺有一男子長九尺服白衣中黃門解步呵問汝何等人白衣妄入宮掖曰我梁伯夏後天使我爲天子步欲前收取因忽不見劾曰尙書春秋左傳曰伯益佐禹治水封於梁颺叔安有裔子曰董父舜賜姓董董之祖與梁同至光熹元年董卓自外入固乘間

景廢帝殺后百官總已號令自由殺戮決前威重於主梁本
安定而卓隴西人俱涼州也天戒若曰卓不當專制奪矯如
白衣無宜闖入宮也白衣見黃門寺及卓之末中黃門誅滅
之際事類如此可謂無乎袁山松曰張角一時狡亂不足致
此大妖斯乃曹氏滅漢之徵也案劭所述與志或有不同年
月舛異故俱載焉臣昭注曰檢觀前通各有未直尋梁卽魏
地之名伯夏明伯於中夏非溥天之稱以內臣孫子得稱王
徵驗有應有若符契復云伯夏教我爲天子後曹公曰若天
命在吾吾爲周文王此乃魏文帝受我成策而陟帝位也風
俗通云見中黃門寺曹騰之家尤見其證

注司馬彪續漢書曰

隋書經籍志續漢書八十三卷晉秘書監司馬彪撰

注騰父節字元偉素以仁厚稱至由是鄉黨貴歎焉

後漢書宦者傳曹節字漢豐南陽新野人也其先本魏郡人
靈帝卽位封長安鄉侯以誅竇武陳蕃封育陽侯養子傳國
續五行志稱靈帝熹平四年六月弘農三輔螟蟲爲害是時
中常侍曹節等讒言禁錮海內清英之士謂之黨人與注以
彪書迥乎不同疑彼是別一曹節此則宋書禮志所謂處士
者也

注長子伯興次子仲興次子叔興騰字季興少除黃門從官
後漢書蔡衍傳劾奏河間相曹鼎賊罪千萬鼎者中常侍騰
之弟也一清案曹節四子騰最少不得更有弟或是其兄

注永寧元年鄧太后詔黃門令選中黃門從官

續百官志云黃門令一人丞從丞各一人本注曰官者從丞主出入從

注太和三年追尊騰曰高皇帝

史通稱謂篇云當塗所出宦官攜養帝號徒加人望不愜故國志所錄無異匹夫應書其人直云皇之祖考而已姜氏宸英曰內臣追尊皇帝惟此

養子嵩嗣官至太尉

後漢書曹騰傳嵩靈帝時貨賂中官及輸西園錢一億萬故位至太尉章懷袁紹傳注引續漢志曰靈帝時賣官嵩以貨得拜大司農大鴻臚代崔烈爲太尉水經陰溝水注曰譙城

南有曹嵩冢冢北有碑碑北有廟堂餘基尙在柱礎仍存廟
北有二石闕雙峙高一丈六尺檼及柱皆雕鏤雲炬上翠
螭已碎闕北有圭碑題云故中常侍長樂太僕特進費亭侯
曹君之碑延熹三年立碑陰又刊詔策二碑文同夾碑東西
列對兩石馬高八尺五寸石作粗拙有騰兄冢冢東有碑題
云漢故潁川太守曹君墓延熹九年卒而不刊樹碑歲月墳
北有其元子熾冢冢東有碑題云漢故長水校尉曹君之碑
歷太中大夫司馬長史侍中遷長水年三十九卒熹平六年
造熾弟允冢冢東有碑題云漢謁者曹君之碑熹平六年立
注吳人作曹瞞傳及郭頒世語並云嵩夏侯氏之子夏侯惇之
叔父太祖於惇爲從父兄弟

何氏焯曰夏侯惇之子楸尚清河公主淵子衡亦娶曹氏則謂嵩夏侯氏子者敵國傳聞蓋不足信隋書經籍志魏晉世語十卷晉襄陽令郭頒撰

太祖少機警有權數而任俠放蕩不治行業

後漢書李膺傳子瓚位至東平相曹操微時瓚異其才將沒謂子宣等曰時將亂矣天下英雄無過曹操張孟卓與吾善袁本初汝外親雖爾勿依必歸曹氏諸子從之並免於亂世章懷注謝承書瓚作珪御覽短人部引魏氏春秋曰武王姿貌短小神明英徹劉劭幼童傳曰太祖年十歲浴於譙水蛟來逼自水奮擊蛟乃退畢浴而還弗之言也後有人見大蛇奔退太祖笑之曰吾爲蛟所擊而未懼斯畏蛇而恐耶眾聞

乃知咸驚異焉世說曰魏武少時嘗與袁紹好爲游俠觀人
新婚因潛入主人園中夜叫呼云有偷兒賊青廬中人皆出
觀魏武乃入抽刃切新婦與紹還出失道墜枳棘中紹不能
得動後大叫云偷兒在此紹遑迫自擲出遂以俱免又曰袁
紹年少時曾遣人夜以劔擲魏武少下不著魏武揆之其後
來必高因帖卧床上劔至果高英雄記曰操與劉備密謀泄
於袁紹紹知操有圖己之意操自咋其舌流血以失言誠後
世

唯梁國橋玄南陽何顒異焉

後漢書何顒傳顒見曹操歎曰漢家將亡安天下者必此人
也一清案識操於微時尙有汝南王雋見後注

注張璠漢紀曰

隋書經籍志後漢紀三十卷張璠撰

注博覽羣書特好兵法鈔集諸家兵法名曰接要又注孫武十三篇

隋書經籍志兵書接要十卷梁有兵書接要別本五卷又有兵書要論七卷又兵法接要三卷又兵書略要九卷梁有兵要二卷魏武帝撰孫子兵法二卷魏武帝注困學紀聞杜牧注孫子序云孫武著書數十萬言魏武削其繁剩筆其精切凡十三篇因注解之攷之史記本傳閻廬日子之十三篇吾盡觀之矣非筆削爲十三篇也何氏云曹氏諱節故作接

年二十舉孝廉爲郎除洛陽北部尉遷頓丘令

宋書百官志光祿勳掌三署郎漢東京三署郎有行應四科者歲舉茂才二人四行二人及三署郎罷省光祿勳猶依舊舉四行衣冠子弟充之三署者五官署左署右署也各置中郎將以司之郡舉孝廉以補三署郎年五十以上屬五官其次分在左右署凡有中郎議郎侍郎郎中四等無員多至萬人續百官志曰凡郎官皆主更直執戟宿衛諸殿門出充車騎唯議郎不在直中又曰凡縣萬戶以上爲令

注曹瞞傳曰太祖初入尉廨繕治四門造五色棒

何云棒改棰依廣韻注

徵拜議郎

後漢書劉陶傳司徒東海陳寔與議郎曹操上言公卿所舉

率黨其私所謂放鴟梟而囚鸞鳳其言忠切

光和末黃巾起拜騎都尉

續百官志騎都尉比二千石本注曰本監羽林騎

討潁川賊遷爲濟南相

續郡國志濟南相故齊文帝分十城東平陵著於陵臺管土
鼓梁鄒鄒平東朝陽歷城也續百官志每郡置太守一人二
千石王國之相亦如之

久之徵還爲東郡太守不就

後漢書光武十王傳琅琊順王容初平元年遣弟邈至長安
盛稱東郡太守曹操忠誠於帝操以此德於邈一清案操雖
不就東郡之命當時猶以此稱之也

注常託疾病輒告歸鄉里築室城外春夏習讀書傳秋冬弋獵以自娛樂

太平寰宇記卷十二引魏略曰太祖於譙東十五里澤中築起精舍讀書射獵閑絕賓客卽謂之譙東水經陰溝水注曰譙城東有曹太祖舊宅所在負郭對廬側隍臨水

注司馬彪九州春秋曰於是陳蕃子逸與術士平原之楷會於芬坐

後漢書陳蕃傳逸官至魯相襄楷傳字公矩平原隰陰人徵太祖爲典軍校尉

此西園八校尉之一見後漢書靈帝紀
卓表太祖爲驍騎校尉

續百官志大將軍營五部部校尉一人宋書百官志驍騎材
官別有營一情案此時無驍騎將軍曹公益以校尉典營兵
也其後乃置驍騎將軍

注世語曰太祖過伯奢伯奢出行五子皆在備賓主禮太祖自
以背卓命疑其圖已手劒夜殺八人而去孫盛雜記曰太祖聞
其食器聲以爲圖已遂夜殺之旣而懷愴曰寧我負人無人負
我遂行

御覽卷四百七十八引梁祚魏國統曰初太祖過故人呂伯
奢也遂行日暮道逢二人容貌威武太祖避之路二人笑曰
觀君之奔有懼之色何也太祖始覺其異乃悉告之臨別大
祖解佩刀與之曰以此表吾丹心願二賢慎勿言

太祖至陳畱散家財合義兵將以誅卓

續五行志獻帝初平中長沙有人姓桓氏死棺斂月餘其母聞棺中聲發之遂生占曰至陰爲陽下人爲上其後曹公由庶士起

注英雄記曰馥字文節潁川人爲御史中丞董卓舉爲冀州牧馥乃作書與紹道卓之惡聽其舉兵

後漢書袁紹傳注引英雄記曰劉子惠中山人兗州刺史劉岱與其書道卓無道天下所共攻死在旦暮不足爲憂但卓死之後當復回師討文節擁強兵何凶逆盜可得置封書與馥馥得此大懼歸答子惠欲斬之別駕從事耿武等排閤伏子惠上願并見斬得不死作徒被赭衣掃除宮門外隋書經

籍志漢末英雄記八卷王粲撰梁有十卷

東郡太守橋瑁注英雄記曰瑁字元偉玄族子

續五行志中平元年夏東郡陳畱濟陽長垣濟陰宛句離狐
縣界有草生其莖靡靡腫大如手指狀似鳩雀龍蛇鳥獸之
形五色各如其狀毛羽頭目足翅皆具近草妖也劉昭注引
應劭風俗通曰亦作人狀操持兵弩萬象備具非但彷彿類
良熟然也又曰關東義兵先起於宋衛之郊東郡太守橋瑁
負眾怙亂凌蔑同盟忿嫉同類以殞厥命陳畱濟陰迎助謂
爲離德棄好卽戎吏民殲之草妖之興豈不或信

山陽太守袁遺注遺字伯業紹從兄

後漢書袁紹傳注引英雄記曰遺紹從弟

三國志卷一
九
同時俱起兵眾各數萬

後漢書崔寔傳寔從兄烈其子鈞少交結英豪有名稱爲西河太守獻帝初鈞與袁紹俱起兵山東董卓以是收烈付郡獄錮之卓既誅拜烈城門校尉及李傕入長安爲亂兵所殺而陳承祚遺之卷末裴注引傅子曰袁紹崔鈞之徒雖爲將帥皆著縑巾卽其人也蓋亦與上諸人同時起兵者

是時紹屯河內邈岱瑁遁屯酸棗

後漢書地理志陳畱郡酸棗

邈遁將衛茲分兵隨太祖到滎陽汴水

漢書地理志河南郡滎陽卞水馮池皆在西南續郡國志滎陽鴻溝水注文頴曰於滎陽下引河東南爲鴻溝卽官渡水

也

從弟洪以馬與太祖得夜遁去

王嘉拾遺記曹洪武帝從弟家盈產業駿馬成羣武帝討董卓夜行失馬洪以其所乘馬讓帝其馬號曰白鵠此馬走時唯覺耳中風聲腳似不踐地至汴水洪不能渡帝引洪上馬共濟行數百里瞬息而至馬足毛不溼時人謂乘風而行亦一代神駿也諺曰憑空虛躍曹家白鵠

太祖責讓之因爲謀曰

是時袁術屯南陽而與紹不相能故不與河北之軍合操益謀兼用之

塞轅轅太谷

何云太谷當作大谷

軍丹析入武關以震三輔皆高壘深壁勿與戰

續郡國志南陽郡丹水析故屬弘農顧氏祖禹讀史方輿紀要卷五十二武關在西安府商州東百八十里東去河南內鄉縣百七十里文穎曰在析西百七十里析卽內鄉也左傳哀四年將通於少習以聽命少習卽武關應劭曰武關秦南關也何云此項羽戰河北高祖西入關之勢也卓兵方盛未挫於外故堅壁勿戰待內釁作而後乘之

遷到龍亢士卒多叛至銓建平復收兵得千餘人

續郡國志龍亢銓建平俱屬沛國

注袁紹與韓馥謀立幽州牧劉虞爲帝太祖拒之

何云以弑君討卓無故又改立君是二卓也

注諸軍北面我自西向

軍一本作君何云虞在幽州故云北面長安爲行在所故曰西向

紹又嘗得一玉印於太祖坐中舉向其肘

後漢書徐璆傳注舉重向肘者乃是袁術逼奪孫堅妻之物
魏武曰我在此不聽汝乃至此其事爲有徵今以弟移作兄陳
承祚之疎也

注紹復使人說太祖曰今袁公勢盛兵彊

何云紹此時僅爲一郡守并未得韓馥讓州未應意盛若此

夏四月

續五行志六月丙戌地震

秋七月

續天文志初平二年九月蚩尤旗見長十餘丈色白出角亢之南占曰蚩尤旗見則主征伐四方其後丞相曹公征討天下且三十年

袁紹脅韓馥取冀州黑山賊子毒白繞眭固等十餘萬眾

寰宇記卷一黑山在封邱縣北三里曹學佺名勝志黑山一名墨山在淇縣西北五十里墨子昔居於此

注眭申隨反

此亦裴音釋後同

毒閭之棄武陽還

東武陽漢縣屬東郡魏屬陽平郡至拓跋魏始去東字此云武陽蓋蒙上文而言也

夏四月

續五行志五月丙申無雲而雷又注引袁山松書曰三年十月丁卯日有重兩倍吳書載韓馥與袁術書曰凶出於代郡注宮說別駕治中

宋書百官志刺史官屬有別駕從事史一人從刺史行部治中從事史一人主財穀簿書

遂進兵擊黃巾於壽張東信力戰關死

續郡國志東平國壽張春秋曰良漢曰壽良光武改壽張有壽張故屬東郡水經汶水注汶水又西至壽張故城東逕爲

澤渚鮑信戰死於此

購求信喪不得眾乃刻木如信形狀

一本無眾字

瓚使劉備屯高唐單經屯平原陶謙屯發干以逼紹

續郡國志高唐平原俱屬平原郡發干屬東郡

太祖與紹會擊皆破之

何云外爲紹用實所以保據兗州也

四年春

續五行志正月甲寅朔日有蝕之在營室四度是時李傕郭
汜專政注引潛潭巴曰甲寅蝕雷電擊殺骨肉相攻又引袁
宏紀曰未蝕八刻太史令王立奏日日咎過度無有變也於

是朝臣皆賀帝密令尙書候焉未晡一刻而蝕尙書賈詡奏曰立伺候不明疑誤上下太尉周忠職所典掌請皆治罪詔曰天道遠事驗難明且災異應政而至雖探道知機焉能無失而欲歸咎吏官益重朕之不德也弗從於是避正殿寢兵不聽事五日

軍鄆城

東漢兗州刺史本治昌邑魏武移治鄆城續郡國志屬濟陰郡

術引軍入陳畱屯封邱

續郡國志陳畱封邱俱屬陳畱郡

術使將劉詳屯匡亭

續郡國志陳留郡平丘有匡注曰匡人之亭曹公破袁術處
術走襄邑追到太壽

太壽不見於兩漢志大約在靈陵襄邑之間詳夏侯惇傳

徐州牧陶謙與其舉兵取泰山華費略任城

漢書地理志泰山郡華續郡國志泰山郡費故屬東海任城
國章帝分東平爲任城方輿紀要卷三十三華城在費縣西
北六十里後漢并入費

注闕於泰山華費闕殺嵩取財物因奔淮南太祖歸咎於陶謙
故伐之

後漢書應劭傳興平元年前太尉曹嵩及子德從琅邪入泰
山劭遣兵迎之未到而徐州牧陶謙素怨嵩子操數擊之乃

使輕騎追嵩德並殺之於郡界劭畏操誅棄郡奔冀州牧袁紹世語云送嵩家而傳云迎之爲不同又陶謙傳曹操父嵩避難琅邪時謙別將守陰平士卒利嵩財寶遂襲殺之亦與吳書異又宦者傳嵩少子名疾或別是一人

夏

續五行志興平元年六月丁丑地震乙巳晦日有蝕之後漢書獻帝紀六月丙子分涼州河西四郡爲雍州注謂金城酒泉敦煌張掖

謙將曹豹與劉備屯郊東要太祖太祖擊破之遂攻拔襄賁所過多所殘戮

漢書地理志鄭襄賁俱屬東海郡水經泗水注曹操攻徐州

破之拔取慮睢陵夏丘等縣以其父避害於此屠其男女十萬泗水爲之不流自是數縣人無行迹亦爲暴矣

布出兵戰先以騎犯青州兵青州兵奔太祖陣亂馳突火出

何云所收黃巾精銳尙未習練猝遇勁騎則偏敗眾攜先犯之者由宮邈素知虛實也姜云不言燒東門不知何緣突火後民無椎冰同此書法是有意爲簡練

注袁暉獻帝春秋曰

隋書經籍志獻帝春秋十卷袁暉撰

蝗蟲起百姓大餓

續五行志興平元年夏大蝗是時天下大亂

秋九月

續五行志秋長安旱是時李傕郭汜專權縱肆

布到乘氏

漢書地理志濟陰郡乘氏應劭曰春秋敗宋師於乘丘是也

冬十月

續五行志十月長安市門無故自壞

太祖至東阿

漢書地理志東郡東阿

二年春襲定陶濟陰太守吳資保南城

續郡國志濟陰郡首定陶蓋郡池也南城卽定陶之南城

布將薛蘭李封屯鉅野太祖攻之布救蘭蘭敗布走遂斬蘭等
布復從東繙與陳宮將萬餘人來戰

漢書地理志鉅野東綰俱屬山陽郡

秋八月圖雍正

漢書地理志陳留郡雍正故杞國也

是歲長安亂天子東遷

續天文志初平四年十月孛星出兩角間東北行入天市中而滅占曰彗除天市天帝將徙帝將易都是時尚在長安後二年東遷明年七月至雒陽其八月曹公迎上都許獻帝紀注引袁宏紀曰字於天市將徙天子移都其後上東遷之應也

敗於曹陽渡河幸安邑

續郡國志弘農郡弘農縣有曹陽亭注引晉灼曰縣東十三

里曹公改曰好陽河東郡首安邑蓋郡治也

太祖軍臨武平

續郡國志陳國武平

衛將軍董承與袁術將義奴拒險洪不得進

後漢書董卓傳言董承患韓暹亂政潛召操此云承拒曹洪
二文不同然召曹公本謀出楊奉董卓傳可審也

斬辟邵等

何云辟字衍汝南降賊劉辟叛應袁紹見後建安五年
天子拜太祖建德將軍夏六月遷鎮東將軍

建德蓋雜號將軍也後不復置宋書百官志鎮東將軍後漢
末魏武帝居之續百官志注獻帝以操爲南中郎將

封費亭侯

董昭傳云龔父爵費亭侯蓋龔父騰封費亭侯傳爵及嗣太祖乃復祖封宜在沛國續郡國志注引帝王世紀謂曹騰封鄧縣費亭是也而湖陸縣注引晉書地道記云縣西有費亭城魏武帝初所封是又在山陽矣

注獻帝春秋曰天子初至洛陽幸城西故中常侍趙忠宅

後漢書宦者傳趙忠安平人桓帝時爲小黃門以與誅梁冀功封都鄉侯靈帝時遷中常侍封列侯後領大長秋

奉別屯梁

漢書地理志河南郡梁縣臣瓚曰此梁是周之小邑見於春秋全氏祖望曰蓋卽指楚人侵梁及霍之梁在戰國爲南梁

地近汝水之旁方輿紀要卷五十一梁縣城在河南汝州西南四十五里

天子假太祖節鉞錄尚書事

宋書百官志前漢遣使始有持節假節假節惟軍事得殺犯軍令者假黃鉞則專戮節將非人臣常器矣又云尚書古官舜命龍作納言卽其任也周官司會鄭玄云若今尚書矣秦世少府遣吏四人在殿中主發書故謂之尚書尚猶主也漢初隸少府武帝世使左右曹諸吏分平尚書事昭帝卽位霍光領尚書事成帝初王鳳錄尚書事東京每帝卽位至太傅錄尚書事薨輒省錄尚書職無不總王肅注尚書納於大麓曰堯納舜於尊顯之官大錄萬機之事也一清案此曹公枌

爲新制任兼內外總攬百揆故旣假節鉞又錄尙書事也

注獻帝紀曰

隋書經籍志靈獻二帝紀三卷漢侍中劉艾撰殘缺梁有六卷

注又領司隸校尉

後漢書獻帝紀建安元年八月辛亥鎮東將軍曹操自領司隸校尉錄尙書事漢書百官公卿表司隸校尉武帝初置屬大司空秩二千石續百官志司隸校尉一人比二千石持節掌察舉百官以下及京師近郡犯法者元帝去節成帝省建武中復置并領一州

洛陽殘破董昭等勸太祖都許

漢書地理志潁川郡許一清案續郡國志注獻帝徙都改許昌非也許昌以魏黃初二年改

九月車駕出轅轅而東

續郡國志河南緄氏有轅轅關注璣曰險道名在縣東南後漢書董卓傳注引獻帝春秋曰車駕出洛陽自轅轅而東楊奉韓暹引軍追之輕騎旣至操設伏兵要於陽城山狹中大敗之

以太祖爲大將軍封武平侯

續百官志將軍不常置掌征伐背叛比公者四第一大將軍次驃騎將軍次車騎將軍次衛將軍注引蔡質漢儀曰漢興置大將軍驃騎位次丞相車騎衛將軍皆金紫位次上卿典

京師兵衛四夷屯警宋書百官志漢東京大將軍自爲官位
在三司上魏明帝青龍三年晉宣帝自大將軍爲太尉然則
大將軍在三司下矣水經陰溝水注潯水又東逕武平縣故
城北魏武皇封於此終以武平華夏矣

自天子西遷朝廷日亂至是宗廟社稷制度始立

後漢書董卓傳注引獻帝起居注曰舊時宮殿悉壞倉卒之
際拾摭故瓦材木工匠無法度之制所作並無足觀也

注侍中太史令王立曰

王立即初平四年奏曰餽無變爲賈詡所劾者宜其獻諛若
此宋書符瑞志有太史令王昱豈卽其人與史通亦作王立
注將自軹關東出

方輿紀要卷四十九關當軹道之險因曰軹關在濟源縣西北十五里

冬十月公征奉

姜云前此無專官故稱太祖至此始改稱公何云自爲大將軍後始稱公蓋天子三公稱公也

天子拜公司空行車騎將軍

後漢書獻帝紀曹操自爲司空行車騎將軍事百官總己以聽

是歲用棗祗韓浩等議始興屯田

續百官志注曹公置典農中郎將秩二千石典農都尉秩六百石或四百石典農校尉秩比二千石所主如中郎部分別

而少爲校尉丞晉書傳之傳魏初課田不務多其頃畝但務脩其功力故白田收至十餘斛水田收至數十斛

注瓦解流離無敵自破者

一本敵下有而字

注袁紹之在河北軍人仰食桑椹

續五行志獻帝興平元年九月桑復生椹可食臣昭曰桑重生椹誠是木異必在濟民安知非瑞乎時蒼生死敗周秦殲盡餓魂餒鬼不可勝言此重椹大拯危命雖連理附枝亦不能及若以爲怪則建武野穀旅生麻菽尤盛復是草妖耶

二年春正月

續五行志獻帝建安二年五月蝗

公到宛

續郡志南陽郡首宛蓋郡治也

長子昂弟子安民遇害

昂字子修卽豐愍王有傳太祖之弟無聞東平靈王徽傳云奉叔父朗陵哀侯後樊安公均傳云奉叔父薊恭公彬後不知二人誰是安民之父

公乃引兵還舞陰

舞陰屬南陽郡字或从水作無

繡奔穢

穢亦南陽之縣

注世語曰舊制三公領兵入見皆交戟義頸而前初公將討穢

入觀天子時始復此制公自此不復朝見

後漢書伏皇后紀自帝都許守位而已宿衛兵侍莫非曹氏
黨舊姻戚議郎趙彥嘗爲帝陳言時策曹操惡而殺之其餘
內外多見誅戮操後以事入見殿中帝不任其憤因曰君若
能相輔則厚幸不爾幸垂恩相捨操失色俛仰求出舊儀三
公領兵朝見令虎賁執刃挾之操出顧左右汗流浹背自後
不敢復朝請

秋九月

續五行志建安二年九月漢水流害民人是時天下大亂
南陽章陵諸縣復叛爲繡

續郡國志章陵故春陵世祖更名

不利還屯葉數爲繡表所侵冬十一月公自南征至宛表將鄧濟據湖陽

葉湖陽皆南陽屬縣

三年

拾遺記建安三年晉徒國獻沈明石雞色如丹大如燕常在地中應時而鳴聲能遠徹其國間鳴乃殺牲以祀之當鳴處掘地則得此雞若天下太平翔飛頡頏以爲嘉瑞亦謂寶雞其國無雞犬聽地中候咎刻道家云昔仙人桐君採石入穴數里得丹石雞舂碎爲藥服之者令人有聲氣後天而死晉漢武帝寶鼎元年四方貢珍怪有琥珀燕置之靜室自於室中鳴翔益此類也洛書云皇圖之寶土德之徵大魏之嘉瑞

初置軍師祭酒

宋書百官志祭酒晉官也漢吳王濞爲劉氏祭酒夫祭祀以酒爲本長者主之故以祭酒爲稱漢之侍中魏之散騎常侍高功者並爲祭酒公府祭酒蓋因其名也一清案祭酒之稱周末有之史記荀卿三爲祭酒是也軍師祭酒本漢官見後漢書鄧禹傳曹公以建安元年拜司空故於三年置軍師祭酒然考之諸臣傳中無全稱軍師祭酒者荀攸爲軍師在建安三年以前無論矣後此郭嘉爲司空軍祭酒無輔字勸進糜璜臨結銜爲軍師祭酒而昭傳云拜司空軍祭酒則知嘉亦軍師祭酒也又糜以荀攸爲中軍師鍾繇爲前軍師涼茂爲左軍師毛玠爲右軍師征孫權表華歆爲軍師而非祭酒

也至王粲陳琳阮瑀路粹號軍謀祭酒皆記室之任也而杜襲則以軍謀祭酒參太樂事其任益輕劉楨荀緯爲軍謀掾並軍謀之屬官也想因軍師名位太尊故降而稱軍謀耶至爲丞相亦設丞相軍祭酒無軍師之號外此楊俊爲征南軍師趙儼爲征東軍師杜襲爲大將軍軍師則亦比於公府之職矣六朝時有軍諮祭酒蓋卽軍謀之易名耳

三月公圍張繡於穰

水經湍水注湍水又逕穰縣故城北又東南逕魏武故城之西南是建安三年曹公收張繡之所築也

到安眾

水經湍水注涅水逕安眾縣竭而爲陂謂之安眾港魏太祖

破張繡於是處與荀彧書曰繡遇吾歸師逼我死地蓋於二水之間以爲沿涉之艱阻也續郡國志南陽郡安眾

冬十月屠彭城

續郡國志徐州彭城國注曰高祖置爲楚章帝改

進至下邳

續郡國志徐州下邳國注曰武帝置爲臨淮郡永平十五年更爲下邳國本屬東海郡

遠決泗沂水以灌城

續郡國志下邳注引戴延之西征記曰有沂水自城西西南注泗別下迴城南亦注泗舊有橋處張良與黃石公會此橋月餘布將宋憲魏續等執陳宮舉城降生禽布宮皆殺之

後漢書獻帝紀斬布在十二月癸酉布傳亦云塹國之三月是也

分琅邪東海北海爲城陽利城昌慮郡

方輿紀要卷三十五莒州廢莒縣漢爲城陽國治後漢國廢又卷二十二贛榆縣西六十里有利城故城又卷三十二滕縣東南六十里有昌慮城曹操嘗置郡尋廢利城昌慮而城陽如故

注且夫起布衣在塵垢之間爲庸人之所陵陷

陷一作陷

注高祖赦雍齒之讐而羣臣以安

臣一作情

公還至昌邑

續郡國志山陽郡首昌邑刺史治蓋太守與刺史並治也

屯射犬

續郡國志河內野王有射犬聚方輿紀要卷四十九射犬城在故武德縣北今河內縣境也

河內太守繆尙畱守

繆當作穆音畱

還軍敖倉

續郡國志河南滎陽有敖亭注曰周宣王狩於敖左傳宣十二年晉師在敖郛之間秦立爲敖倉

以魏种爲河內太守屬以河北事

何云釋畢謀魏种而用之皆假以懷四方之士於時宿儒世
胃大抵多在河北漢南也評所謂矯情任算不念舊惡益指
此類

公曰唯其才也

唯水經清水注作難

秋八月公進軍黎陽使臧霸等入青州

續郡國志魏郡黎陽何云入青州者所以擾紹之左以分其
兵

破齊北海東安

續郡國志琅邪國東安故屬城陽

遣劉岱王忠擊之

何云兩劉岱俱字公山此別是一人非正禮之兄

注忠不欲去因率眾伍逆擊之

伍一作什

注令佻取冢間髑髏繫著忠馬鞍

一本無著字

注孫盛魏氏春秋云

隋書經籍志魏氏春秋二十卷孫盛撰

二月紹遣郭圖淳于瓊顏良攻東郡太守劉延於白馬紹引兵至黎陽將渡河

方輿紀要卷十六大名府滑縣漢白馬縣地建安五年袁紹遣顏良攻東郡太守劉延於白馬蓋是時縣爲東郡治一清

案潁滑間渡河處主河北而言則曰黎陽主河南而言則曰
白馬東郡本治濮陽太祖爲東郡太守徙治東武陽至是又
移治白馬也後漢書臧洪傳臧洪爲東郡太守都東武陽
紹進保陽武

續郡國志河南陽武

八月

續五行志建安五年九月庚午朔日有食之注引潛潭巴曰
庚午蝕後火燒官兵一清案其應在烏巢

紹連營稍前依沙地爲屯

方輿紀要卷四十七關封府陽武縣秦博浪沙地袁紹依沙
地爲屯或云卽博浪沙

注習鑿齒漢晉春秋曰

隋書經籍志漢晉陽秋四十七卷晉陽太守習鑿齒撰

時公兵不滿萬

何云上固云分營與相當矣則此但指自將之親兵也然亦必有一二萬人云不滿萬則非其實

注諸書皆云公抗紹眾八萬

抗乃坑之譌

或以為紹悉眾聚官渡

水經渠水注渠水又左逕陽武縣故城南東爲官渡水又逕曹太祖塋北有高臺謂之官渡臺渡在中牟故世又謂之中牟臺北土山猶在山之東悉紹舊營遺基并存

冬十月

續天文志建安五年十月辛亥有星孛於大梁冀州分也時
袁紹在冀州其年十一月紹軍爲曹公所破七年夏紹死後
曹公遂取冀州

注今袁氏輜重有萬餘乘在故市烏巢屯

水經濟水注濟瀆又東逕酸棗縣之烏巢澤澤北有故市亭
一清案故市漢縣屬河南郡後漢縣廢在今鄭州北

注銜枚縛馬日夜從間道出

日一本作口是也

注公意欲不殺許攸曰明日鑒於鏡此益不忘人

何云靈帝時瓊爲佐軍校尉與魏武皆西園八校尉之一故

三國志注卷一
欲活之一清案鑒鏡不忘謂已割其鼻也

注遣故任長畢瑜詣虔爲說命錄之數

漢書地理志廣平任續郡國志鉅鹿郡任

注又紹與臣書云可都甄城

甄當作鄆

六年夏四月揚兵河上擊紹倉亭軍

水經漯水注河水於范縣東北流爲倉亭津

九月

續五行志建安六年十月癸未朔日有蝕之

公還許

何云紹地廣眾盛謀士尙多其兵雖敗未可取也故歸許以

養威侯爨且以其閒翦玄德復起之勢得以全力徐收河北
莫能牽制耳

汝南賊龔都等應之

龔都見先主傳

七年

續五行志七年越嶲有男化爲女子時周羣上言哀帝時亦
有此異將有易代之事至二十五年獻帝封於山陽又曰建
中女子生男兩頭共身

遂至浚儀治睢陽渠遣使以太牢祀橋玄

續郡國志陳畱郡浚儀故大梁劉昭引通俗文渠在浚儀曰
黃蕩也方輿紀要卷四十七及卷五十云蓋因睢水而作渠

睢水於浚儀首受葦蕩水東過睢陽故曰睢陽渠水經睢水注睢陽城北五六里便得漢太尉橋玄墓冢東有廟卽曹氏孟德親酌處

紹自軍破後發病歐血夏五月死

後漢書獻帝紀紹死在五月庚戌

八年

續五行志建安七八年中長沙醴陵縣有大山常大鳴如牛响聲積數年後豫章賊攻沒醴陵縣殺畧吏民注干寶曰論語槃輔象曰山土崩川閉塞漂淪移山鼓哭閉衡夷庶桀合兵王作於時戰爭四分五裂之地荊州爲劇故山鳴之異在其域也

夏四月進軍鄴

續郡國志魏郡首鄴蓋郡治是時袁紹以州牧治此

注論者之言一似管窺虎瞰

晉書王獻之傳有窺豹之語似因避唐諱而改

冬十月

後漢書獻帝紀八年冬十月己巳公卿初迎冬於北郊總章
始復備八佾舞初置司直官督中都官續百官志注引獻帝
起居注曰八年十二月復置司直不屬司徒掌督中都官不
領諸州九年十二月詔司直北司隸校尉坐同席在上假傳
置從事三人書佐四人一清案曹公以杜畿爲司空司直則
公府之屬亦仿王官之制也

到黎陽爲子整與譚結婚注臣松之案紹死至此過周五月耳
譚雖出後其伯不爲紹服三年而於再葬之內以行吉禮悖矣
美云譚尙兄弟爲仇豈知此禮魏武欲乘其亂而取亦不暇
顧忌名教裴駿迂甚

注今云結婚未必便以此年成禮

下云女還然後進軍非成婚而何

屯陽平

漢書地理志東郡陽平

過淇水入白溝以通糧道

水經淇水注淇水又南歷枋堰舊淇水口東流逕黎陽縣界
建安九年魏武王於水口下大枋木以成堰過淇水東入白

溝以通漕運故時人謂其處爲枋頭

公進軍到洹水

續郡國志河內郡林慮注引徐廣曰洹水所出

武安長尹楷屯毛城

漢書地理志魏郡武安方輿紀要卷四十九毛城在磁州武安縣西

公自將擊楷破之而還尙將沮鵠守邯鄲又擊拔之

續郡國志趙國首邯鄲何云破楷則高幹并州之援北斷拔邯鄲則袁熙幽州之援東絕擊楷自將者運道不通則堅城大眾有自潰之勢所係尤大也

易陽令韓範涉長梁岐

續郡國志趙國易陽方輿紀要卷四十九涉縣漢沙縣屬魏郡

若尋西山來者此成禽耳

西山當指太行山續郡國志魏郡鄴縣注引魏都賦注曰縣西北有鼓山時時自鳴鳴則兵案本傳有西唐山又鄴北太行山西北去不知山所極處亦如東海不知水所窮盡也

尚果循西山來臨滏水爲營

續郡國志鄴有滏水注曰魏都賦北臨漳金則冬夏異沼注云水經鄴西北滏水熱故名滏口

尚懼故豫州刺史陰夔及陳琳乞降

何云尚懼下疑落遺字一清案紹傳有之

尙走中山

續郡國志中山國高帝置

盡獲其輜重得尙印綬節鉞

魏武帝集破袁尙上事曰臣前上言逆賊袁尙還卽厲精銳討之今尙人徒震蕩部曲喪守引兵遁亡臣軍被堅執銳朱旗震耀虎士雷譟敵望旗眩精聞聲喪氣投戈解甲翕然沮壞尙單騎遁走捐棄偽節銳鈇大將軍郝鄉侯印各一枚兜鍪萬九千六百二十枚其矛楯弓戟不可勝數

八月審配兄子榮夜開所守城東門內兵

方輿紀要卷四十九鄴城有七門東曰建春門

公臨祀紹墓哭之流涕

宋書袁粲傳齊永明元年詔曰昔魏矜袁紹恩給丘墳指此事也

注昔漢高失之於項氏魏武遵謬於此舉豈非百慮之一失也
後漢書孔融傳曹操攻屠鄴城袁氏婦子多見侵略而操子
丕私納袁熙妻甄氏融乃與操書稱武王伐紂以妲己賜周
公操丕悟後問出何經典對曰以今度之想當然耳觀此則
史多飾詞孫盛之評殆爲贅述

紹曰吾南據河北阻燕代兼戎狄之眾南向以爭天下庶可以
濟乎

何云紹見光武資河北以定海內故圖據之

公之圖鄴也譚略取甘陵安平渤海河閒

續郡國志清河國桓帝建和二年改爲甘陵安平國故信都
漢書地理志渤海郡高帝置河閒國故趙文帝別爲國
尙奔故安

續郡國志涿郡故安

譚懼拔平原走保南皮

續郡國志勃海郡南皮

十二月

續天文志建安九年十一月有星孛於東井輿鬼入軒轅太
微

十年春正月攻譚破之斬譚誅其妻子冀州平

鄴雖破而譚猶擾其東偏故必斬譚而後書冀州平英雄記

三國志注卷一
日操於南皮攻袁譚斬之搦作鼓吹自稱萬歲於馬上舞
禁厚葬

宋書禮志漢以後天下送死者靡多作石室石獸碑銘等物
建安十年魏武帝以天下彫弊下令不得厚葬又禁立碑高
貴鄉公甘露二年大將軍參軍太原王倫卒倫兄俊作表德
論以述倫遺美云祇畏王典不得爲銘乃撰錄行事就刊於
墓之陰云爾此則碑禁尙嚴也此後復弛替

乃渡潞河

續郡國志潞陽郡有潞縣蓋以河水得名

公之拔鄴幹降遂以爲刺史

續郡國志太原郡晉陽刺史治

幹還守壺關城

方輿紀要卷四十二壺關屬上黨魏收曰秦上黨郡治壺關
漢治長子董卓又移治壺關漢書地理志郡有壺口關一清
案續郡國志長子注引上黨記曰關城都尉所治

十一年春正月

續天文志正月星孛於北斗首在斗中尾貫紫宮及北辰占
曰彗星掃太微宮人主易位其後魏文帝受禪

公圖壺關三月拔之

寰宇記卷四十五潞州城漢壺關縣也上黨記曰曹公之圍
壺關起土山於西域內築界城以遮之又縣東南有曹公壘
攻高幹所築

上洛都尉王瑒捕斬之

方輿紀要卷五十四上洛廢縣今商州治東漢末以縣在武關峽關之間置上洛都尉

公東征海賊管承至滄于

續郡國志滄于縣屬北海

割東海之婁賁郟賊以益琅邪

續郡國志東海郡郟刺史治案郡首郟亦太守治今割入琅邪未知太守更治何縣賊婁賁並東海縣又獻帝紀立故琅邪王濟北北海阜陵下邳常山甘陵濟陰平原八國皆除據光武十王傳琅邪順王容弟邈有德於操故立熙爲王熙在位十一年坐謀欲過江被誅國除

鑿渠自呼沱入泝水

泝音

名平虜渠又從洶河口

洶音

鑿入潞

河名泉州渠以通海

後漢書光武紀注呼沱河舊在饒陽南魏太祖因饒河故瀆
決令北注新溝水所以今在饒陽縣北一清案水經鮑丘水
注引陳壽魏志曰曹太祖從洶口鑿渠逕雍奴泉州以通河
海濡水注曰濡水自雍奴縣承鮑丘水東出謂之鹽關口魏
太祖征蹋頓與洶口俱導世謂之新河陳壽魏志曰以通河
海也道元兩引陳志俱有河海字與今書不同河卽呼沱河
也寰宇記卷六十六西武垣城在今瀛洲西南三十八里微
北三十里又有一武垣城謂之東武垣城因曹公鑿渠引泚
沱水遂移西武垣城於此置武垣縣

公自崔子還業

袁譚既死尙熙遠遁尙有高幹倔強肘腋既斬幹而袁氏親屬盡矣乃始經營鄴都也

其促定功行封

何云封功臣乃徐議自尊矣

注與諸將士大夫共從戎事

姜云士大夫謂將士也見李廣傳一清案邴原傳注引原別傳亦有此稱

夏五月至無終

漢書地理志右北平無終方輿紀要卷十一玉田縣西有無終城

引軍出盧龍塞塞外道絕不通乃墜山堙谷五百餘里經白檀
歷平岡涉鮮卑庭東指柘城

水經濡水注盧龍塞道自無終縣東出渡濡水向林蘭陁東
至青陁盧龍之險峻坂縈折故有九崢之名盧龍故城魏武
征蹋頓所築也方輿紀要卷十一卷十八白檀廢縣在密雲
縣南漢置屬漁陽郡以縣有白檀山而名後漢廢平岡城在
營州西南五百里漢縣爲右北平郡治後漢移郡治土垠縣
遂廢柘城廢縣卽營州治也其故城在營州南漢置縣屬遼
西郡西部都尉治焉後漢廢俱在今大寧衛東
八月登白狼山

漢書地理志白狼縣屬右北平以縣有白狼山故名方輿紀

要卷十八山在營州西南後漢縣省

斬蹋頓及名王已下

水經大遼水注英雄記曰操一戰斬蹋頓以首擊馬鞍於馬上作十片博物志曰魏武于馬上逢獅子使格之殺傷甚眾王乃統率常從健兒數百人擊之獅子哮呼奮越左右咸驚王忽見一物從林中出如狸超上王車輒上獅子將至此獸便跳上獅子頭上獅子卽伏不敢起於是遂殺之得獅子而還未至洛陽四十里洛中雞犬皆無鳴吠

及公破烏丸

晉書樂志鼓角橫吹曲鼓案周禮以鼗鼓鼓軍事角說者云蚩尤氏帥魍魎與黃帝戰於涿鹿帝乃命始吹角爲龍鳴以

禦之其後魏武北征烏丸越沙漠而軍士思歸於是減爲生
鳴而尤更悲矣

公還鄴作立武池以肄舟師

水經洹水注魏武立武故苑舊有立武池以肄舟楫有漁梁
釣臺竹木灌叢今池林絕滅畧無遺跡

漢罷三公官置丞相御史大夫夏六月以公爲丞相

後漢書獻帝紀曹操自爲丞相百官志注董卓自太尉進爲
相國而司徒不省及建安末曹公爲丞相郗慮爲御史大夫
則罷三公官郗慮免不復補荀綽晉百官表注曰獻帝置御
史大夫職如司空不領侍御史宋書百官志御史大夫有二
丞其一曰御史丞其二曰御史中丞獻帝時更置御史大夫

自置長史一人不復領中丞也一清案宋志魏武爲丞相以來置左右長史而已此謂於漢舊儀之外別增二官非謂盡省前職也歷觀諸臣傳中多有爲參軍掾屬者一時人材無不網羅入府

注先賢行狀曰瑒字孟平廣陵人

後漢書瑒傳作孟玉疑平字誤

注術死後瑒得術璽致之漢朝

北齊書辛術傳術移鎮廣陵獲傳國璽送鄴此璽卽秦所制方四寸上紐交盤龍其文曰受命於天旣壽永昌二漢相傳又傳魏晉懷帝敗沒於劉聰聰敗沒於石氏石氏敗晉穆帝永和中原陽太守戴僧施得之遣督護何融送於建鄴歷宋

齊梁敗侯景得之景敗侍中趙思賢以璽投景南兗州刺史郭元建送於術故術以進焉魏書太武紀太平眞君七年鄴城毀五層佛圖於泥像中得玉璽二其文皆曰受命於天既壽永昌其一刻其傍曰魏所受漢傳國璽

注九月

續五行志建安十三年十月癸未朔日有蝕之注引潛潭巴曰癸未蝕仁義不明

注公到新野琮遂降

續天文志建安十二年十月辛卯有星孛於鶉尾荊州分也時劉表據荊州明年秋表率以小子琮自代曹公伐荊州琮懼舉軍降

注備走夏口公進軍江陵

續漢郡國志襄陽江陵並屬南郡新野屬南陽方輿紀要卷七十九樊城在襄陽府城北漢江上與襄陽城隔江對峙後漢末爲戍守處建安十三年入於操卷七十五夏口在今武昌府城西亦曰沔口亦曰漢口亦曰魯口或以夏水名或以漢水名或以對魯山岸爲名實一處也武昌卽漢之沙羨屬江夏

注衛恆四體書勢序曰上谷王次仲善隸書始爲楷法至靈帝好書世多能者而師宜官爲最

唐張懷瓘書斷八分者秦羽人上谷王次仲所作始皇召之三徵不至大怒制檻車送之於道化爲大鳥飛去師宜官南

陽人靈帝好書徵天下工書於鴻都門至數百人八分稱宜官爲最書如雕羽未息翩翩自逝晉書衛恆傳宜官後爲袁術將今鉅鹿宋子有耿球碑是術所立其書甚工云是宜官也

注使在秘書以勤書自效

何云勤字宋本書苑菁華作勒

注鵠字孟黃安定人

何云黃宋本作皇一清案水經注書斷並作孟皇古字通書斷云安定烏氏人舉孝廉爲郎亦在鴻都門下

注皇甫謐逸士傳曰汝南王儁字子文少爲范滂許章所識章一作竟

注公於外密語僞曰天下將亂爲亂魁者必此二人也

何云歷世持權賓客翕習其人又小有才鮮不爲亂者二袁卽前漢之王氏也

注及平荊州自臨江而迎喪

何云宋本無而字

公自江陵征備至巴丘遣張熹救合肥

漢書地理志九江郡合肥南郡華容雲夢澤在南續郡國志注杜預曰枝江縣有雲夢城江夏安陸縣東南有雲夢城或云華容縣東南亦有雲夢巴丘湖江南之雲夢也爾雅十藪楚有雲夢郭璞曰巴丘湖是也御覽卷十五英雄記曰曹公赤壁之後行至雲夢大澤中遇大霧迷失道路襄宇記卷一

百四十六宋永初山川古今記雲夢一名巴丘湖荊州之蕪
故魏武與吳主書云赤壁之困過雲夢澤中遇大霧遂使失
道是此巴丘卽在容華縣界

公至赤壁與備戰不利於是大疫吏士多死者乃引軍還

寰宇記卷一百十二鄂州蒲圻縣赤壁卽曹公敗處方輿紀
要卷七十六赤壁山在嘉魚縣西七十里元和志山在蒲圻
縣西北一百二十里時未置嘉魚縣也其北岸相對者爲烏
林卽周瑜焚曹操船處今江漢間言赤壁者有五漢陽漢川
黃州嘉魚江夏也當以嘉魚之赤壁爲據又漢川縣大赤鄉
有舊城俗呼金鼓城曹操烏林之敗雞鳴出走至大赤天曙
卽此美云赤壁大敗魏書諱之

備遂有荊州江南諸郡

晉地書地理志建安十三年魏武盡得荊州之地分南郡以
北立襄陽郡分南陽西界立南鄉郡分枝江以西立臨江郡
及敗於赤壁南郡以南屬吳吳後遂與蜀分荊州於是南郡
零陵武陵以西爲蜀江夏桂陽長沙爲吳南陽襄陽南鄉爲
魏而荊州之名南北雙立蜀分南郡立宜都郡一清案水經
注卷三十一涇水又南逕苑城東荊州刺史治故亦謂之荊
州城亦見後王昶傳

注山陽公載記曰

隋書經籍志山陽公載記十卷樂資撰

軍至譙作輕舟治水軍秋七月自渦入淮出淝水軍合肥

魏書地形志南譙郡渦陽縣有曹操祠方輿紀要卷二十一
八角臺在亳州東南三里相傳曹操所築於此大饗軍士又
卷二十六廬州府合肥縣浚遒城漢縣屬九江郡曹操侵吳
嘗頓兵於此修葺故城俗亦謂之曹城教督臺在府城東曹
操所築舒城縣東南二十里曰茆城相傳曹屯兵其地因築
此城廬江縣龍舒城漢縣屬廬江郡縣西南二十五里有大
城相傳操拒吳時築西北四十里有金牛城在金牛山下亦
魏武駐兵處西五十里有馬槽山上有寨壘相傳曹魏所築
又有飲馬池東南四十里有梅山俗傳操率兵望梅止渴卽
此山無爲軍本巢縣之無爲鎮操攻吳築城於此無功而還
因號無爲城白馬街山在無爲州西北五十里相傳魏武牧

馬之處其相近者曰曹家山魏武屯兵處

置揚州郡縣長吏開芍陂屯田

續郡國志當塗縣注引皇覽曰楚大夫子思造芍陂何云由此淮南遂爲重鎮

冬作銅爵臺

水經濁漳水注鄴城之西北有三臺其高若山魏武所起中銅雀臺高十丈有屋百餘間臺成命諸子登之并使爲賦陳思王下筆成章美捷當時南則金虎臺高八丈有屋一百九間北曰冰井臺亦高八丈有屋一百四十間上有冰室室有數井井深十五丈藏冰及石墨焉石墨可書又然之難盡亦謂之石炭又有粟窖或鹽窖以備不虞今窖上猶有石銘存

馬左思魏都賦曰三臺列峙而崢嶸者也文選魏都賦劉逵
注銅雀園西有三臺而以金虎爲金鳳乃劉注之誤詳見後
注以及子植兄弟過於三世矣

何云子植當作子桓對臣下不嫌稱子之字觀陳思王傳注
中屢稱子建見於諸令則此爲桓字無疑也

注今上還陽夏柘苦三縣

續郡國志陽夏苦柘皆陳國屬縣

注據爲范陽侯豹爲饒陽侯食邑各五千戶

續郡國志涿郡范陽安平國饒陽故名饒屬涿

天子命公世子丕爲五官中郎將

續百官志五官中郎將一人比二千石主五官郎一清案魏

晉更無其官殆以曹丕始居之故廢耳

太原商曜等以大陵叛

漢書地理志太原郡大陵

馬超遂與韓遂楊秋李暋成宜等叛

暋當作堪下文及馬超張魯傳注可證

與超夾關而軍

水經河水注河水自潼關東北流水側有長坂謂之黃巷坂
坂傍絕澗涉此坂以升潼關歷北出東嶠通謂之函谷關也
遂岸天高空谷幽深澗道之狹車不方軌號曰天嶮郭緣生
記曰漢末之亂魏武征馬超連兵此地今際河之西有曹公
壘道東原上云李典營

夜渡蒲坂津據河西爲營

兩漢志河東郡蒲坂方輿紀要卷四十一蒲津關在蒲州西門外黃河西岸今名大慶關山陝間之喉吭也亦曰蒲津渡公自潼關北渡

方輿紀要卷五十二潼關之名始見於此在西安府華州華陰縣東四十里又卷五十四引志云古潼亭也全氏祖望曰何焯云函谷關潼關蓋一地而異名也通典漢武帝徙函谷關於新安至獻帝西幸出關猶在新安建安十六年曹操破馬超於潼關卽是中間移此所謂國之巨防不爲細事而史官失之是以杜岐公亦直謂函谷關卽潼關特徙其地耳然通典於新安縣下云魏明帝景初元年河南尹盧延請卻函

谷於峭下弘農守杜恕議以東徙潼關著郡下省函谷關徙
崩關於廬氏正始元年弘農守孟康請移函谷關更號大峭
關又爲金關地理志曰是年廢函谷關然則潼關置於季漢
而函谷關廢於魏之正始岐公前說蓋未經刊正者也

潛以舟載兵入渭爲浮橋

水經渭水注渭橋秦置亦曰便門橋舊有付畱神像此神嘗
與魯班語班令其神出付畱曰我貌醜醜卿善圖物容我不
能出班於是拱手與言曰出頭見我付畱乃出首班以腳畫
地付畱覺之便還沒水故置其像於水唯背以上立水上後
董卓入關遂焚此橋魏武更修之橋廣三丈六尺付畱之像
曹公乘馬見之驚又命下之

注婁子伯說公曰

婁圭字子伯見崔瑗傳

注今天寒可起沙爲城以水灌之可一夜而成

方輿紀要卷五十四沙城在華州蒲城縣東沮水側

遂超等走涼州楊秋奔安定

漢書地理志安定郡武帝置

圍安定秋降

續郡國志安定郡治臨涇注引謝承書曰宣仲爲長史民叛
畱改曰宜民見李固傳而志無此改豈承之妄乎

注魏略曰楊秋黃初中遷討寇將軍

楊秋於延康年爲冠軍將軍與張郃討山賊鄭甘盧水叛胡

三國志卷之十一
見郭淮傳宋書百官志討寇將軍在四十號之列後漢及魏所置

十七年春正月

續五行志六月庚寅晦日有蝕之又注引袁山松書曰曹操專政十七年七月大水消水溢

注馬超餘眾梁興等屯藍田

漢書地理志京兆尹藍田

鉅鹿之虞陶曲周南和廣平之任城趙之襄國邯鄲易陽以益魏郡

續郡國志鉅鹿郡注云秦置建武十三年省廣平國以其縣屬漢書地理志任屬廣平國此時無廣平國而猶襲舊文何

也廣平郡以魏黃初二年置亦不得於此先書之

冬十月

續天文志十二月有星孛於五諸侯周羣以爲西方專據土地者皆將失土

十八年春正月進軍濡須口

方輿紀要卷二十六濡須水在無爲州東北二十里源出巢湖經濡須山又東五十里曰柵港河亦曰柵江經和州西南入江亦曰柵口也御覽卷七十五引續搜神記廬江箏笛浦浦中有大船覆水內漁人宿旁聞箏笛之聲及香氣氤氳是曹公載妓船覆于此

注詔書并十四州復爲九州

後漢書獻帝紀注引獻帝春秋曰時省幽并州以其郡國併於冀州省司隸校尉及涼州以其郡國併爲雍州省兗州併荊州益州於是有兗豫青徐荆揚冀益雍九數雖同而禹貢無益州有梁州然梁益亦一地也一清案郡國志首司隸次豫冀兗徐青荆益揚涼并幽而以交州終焉合得十三州此云十四州以爲參錯且兗州亦未嘗省也十三州之中獨不及交豈卽兗州之訛與益十四州當數雍州建安中分涼州置見晉書地理志

注遂與融互相長短以至不睦公以書和解之

後漢書孔融傳山陽祢衡承望風旨以微法奏免融官因顯明讐怨操故以書激厲融曰蓋聞唐虞之朝有克讓之臣故

麟鳳來而頌聲作也後世德薄猶有殺身爲君破家爲國及至其敝睚眦之怨必讐一餐之惠必報故鼂錯念國違禍於袁盎屈平悼楚受譖於椒蘭彭寵傾亂起自朱浮鄧禹威損失於宗馮由此言之喜怒怨愛禍福所因可不慎與昔廉藺小國之臣猶能相下寇賈倉卒武夫屈節崇好光武不問伯升之怨齊侯不疑射鈎之虜夫立大操者豈累細故哉往聞二君有執法之平以爲小介當收舊好而怨毒漸積志相危害聞之慨然中夜而起昔國家東遷文舉盛歎鴻豫名實相副綜達經學出於鄭玄又明司馬法鴻豫亦稱文舉奇逸博聞誠怪今者與始相違孤與文舉旣非舊好又於鴻豫亦無恩紀然願人之相美不願人之相傷是以區區思協歡好又

知二君羣小所構孤爲人臣進不能風化海內退不能建德
和人然撫養戰士殺身爲國破浮華交會之徒計有餘矣融
報曰猥惠書教告所不逮融與鴻豫州里比鄰知之最早雖
嘗陳其功美欲以厚於見私信於爲國不求其覆過掩惡有
罪望不坐也前者黜退惟欣受之昔趙宣子朝登韓厥少被
其戮喜而求賀況無彼人之功而敢枉當官之平哉忠非三
閭智非量錯竊位爲過免罪爲幸乃使餘論遠聞所以慚懼
也朱彭寇賈爲世壯士愛惡相攻能爲國憂至於輕弱薄劣
猶昆蟲之相嚙適足還害其身誠無所至也晉侯嘉其臣所
爭者大而師曠以爲不如心競性既遲緩與人無傷雖出胯
下之負榆次之辱不知貶毀之於己猶蚊虻之過也子產謂

人心不相似或矜勢者欲以取勝爲榮不念宋人待四海之客大鑪不欲令酒酸也至於屈穀巨瓠堅而無竅當以無用罪之耳他者奉遵嚴教不敢失墜郗爲故吏融所推進趙衰之拔郗穀不輕公叔之升臣也知同其愛訓誨發中雖懿伯之忌猶不得念況恃舊交而欲自外於賢吏哉輒布腹心脩好如初苦言至意終身誦之

遷於唐衛

此衛卽康成書注分衛爲并州之衛指常山之衛水也

宗廟乏祀社稷無位

獻帝自陝幸安邑建安元年郊祀上帝於安邑安邑去平陽爲近故云

率土之民

文選作一人尺土

羣臣釋位

文選臣作后

延及平民君又翦之

文選作延於平民君又討之翦除其迹

君則致討克黜其難遂遷許都

文選作又賴君勦尅黜其難遂建許都

蘄陽之役

後漢書袁術傳注引水經曰蘄水出江夏蘄春縣北山鄢元

注云卽蘄山也西南流經蘄山又南對蘄陽注於大江亦謂

之蘄陽口胡三省通鑑卷六十二注曰術時侵陳操東征之術留橋蕤等拒操蕤等敗死術乃走渡淮則蓋戰於淮外也安得至江夏之蘄陽哉此蓋沛國之蘄縣一清案胡氏本文選李善注當是也善曰蘄縣屬沛在陳之東

稜威南邁

邁文選作厲

回戈東征

征文選作指

乘輶將返張楊殂斃

文選輶作軒殂作沮

袁紹逆亂天常

文選無亂天二字

運其神策

其文選作諸

致屈官渡注詩曰致天之屈於牧之野鄭玄云屈極也

極當作殛

注遂定邊境

境文選作城

吏無苛政民無懷慝敦崇帝族表繼絕世

文選無懷作不回表作援

封君爲魏公

魏公下文選有使使持節御史大夫盧授君印綬冊書金虎

符第一至第五竹使符第一至第十三凡十一字

其以丞相領冀州牧如故

如故下文選有今更下傳璽肅將朕命以允華夏其上故傳
武平侯印綬今二十三字

穉人昏作

人文選作民

遠人革面

革文選作回

注於是中軍師王凌謝亭侯荀攸

何云陳少章曰下文皆云攸等則王字衍彥雲於太祖時未
得爲中軍師也凌謝是凌樹之誤荀攸封陵樹亭侯此錯誤

之顯然者一清案下云攸等所大懼也明是公達爲首而非彥雲矣

注建忠將軍昌鄉侯子輔

宋書百官志建武將軍魏置而平虜建忠二號不見雜號之列餘皆因漢舊名

注太中大夫都鄉侯賈翊

翊當作詡

行驍騎將軍安平亭侯曹仁領護軍將軍王圖

宋書百官志驍騎將軍魏世置爲內軍護軍將軍掌外軍續百官志注引魏略曰曹公置護軍將軍比二千石宋書百官志第三品有領護軍此云領護軍將軍卽志所謂領護資重

者爲領軍護軍將軍資輕者爲中領軍中護軍也然領軍護軍自是二官未嘗合稱此云領護軍將軍似以他官兼領之曹真傳真以中堅將軍領中領軍是其例也

非臣無功

無微也無功謂微功也

秋七月

續天文志十八年秋歲星鎮星熒惑俱入太微逆行畱守帝坐百餘日占曰歲星入太微人主改獻帝紀注云守五十日始建魏社稷宗廟

晉書禮志是年七月始建宗廟於鄴自以諸侯禮立五廟也後雖進爵爲王無所改易宋書樂志魏俞兒舞歌四篇魏國

初建所用後於太祖廟並作之王粲造四篇謂予俞新福歌
督俞新福歌安臺新福歌曲行辭新福歌曲也又晉書禮志
漢至魏但太社有稷而官社無稷故常二社一稷也

天子娉公三女爲貴人

陳思王集敘愁賦序曰時家二女弟故漢皇帝娉以爲貴人
家母見二弟愁思故令予作賦

九月作金虎臺

溫庭筠金虎臺詩云碧草連金虎青苔蔽石麟而劉逵魏都
賦注作金鳳劉良文選注因之皆誤也北齊書文宣紀天保
九年改銅爵曰金鳳金獸曰聖應冰井曰崇光則金鳳銅雀
一也後人作鄴中三臺碑亦仍其繆

鑿渠引漳水入白溝以通河

水經洹水又東過內黃縣北東入於白溝酈元濁漳水注魏太祖鑿渠引漳水東入清洹以通河漕名曰利漕渠漳津故瀆水舊斷溪東北出涓流滌注而已

冬十月分魏郡爲東西部置都尉

水經濁漳水注以爲三魏也續百官志武帝置屬國都尉主蠻夷降者中興邊郡往往置都尉及屬國都尉稍有分縣治民比郡

十一月初置尙書侍中六卿

此魏國之官也故曰初置宋書百官志尙書古官也魏世有吏部左民民曹五兵度支五曹尙書有殿中吏部駕部金部

虞曹比部南主客祠部度支庫部農部水部儀曹三公倉部
民曹二千石中兵外兵別兵都兵考功定科凡二十三曹郎
青龍二年有軍事尚書令陳矯奏置都官騎兵二曹郎合爲
二十五曹侍中本秦丞相史也掌奏事直侍左右應對獻替
法駕則正直一人負璽陪乘殿內門下眾事皆掌之周公戒
成王立政之篇所云常伯卽其任也魏晉以來置四人別加
官不主數秩比二千石至六卿者按漢以太常光祿勳衛尉
太僕廷尉大鴻臚宗正大司農少府爲九卿王國省廷尉少
府宗正三卿此漢舊儀也然裴注於二十一年引魏書曰始
置奉常宗正官二十二年引魏書曰初置衛尉官斯時九卿
咸備其職且所省者亦非廷尉少府故始建國卽以大理鍾

繇爲國相大理廷尉也十九年注引獻帝起居注魏送貴人於漢侍送者有少府延康元年注引禪代眾事有少府糞土臣毛宗又丁亥令云故少府謝渙萬潛則漢代王國所省之二卿儼然在列蓋始猶存謙益之名繼有帝制自爲之漸隨意置省元不拘拘於漢舊儀也六卿之名略見延康元年所改

氏王千萬叛應超屯興國使夏侯淵討之

方輿紀要卷五十九興國城在陝西秦州秦安縣西北後世初平中略陽氏築城於此號興國城氏酋阿貴據其城自稱興國氏王千萬益清水氏種也晉書江統徙戎論曰漢末之亂關中殘滅魏興之初與蜀分隔疆場之戍一彼一此魏武

皇帝令將軍夏侯妙才討叛氐阿貴千萬等後因拔棄漢中
遂徙武都之種於秦川欲以弱寇彊國并禦蜀虜

南安趙衢漢陽尹奉等討超

漢書地理志天水郡武帝置明帝改曰漢陽續郡國志漢陽
郡注引秦州記中平五年分置南安郡

韓遂徙金城

漢書地理志金城昭帝置

省安東永陽郡

漢魏之際別無安東郡疑是東安之訛東安郡蓋分瑯邪立
不知置於何時續郡國志注引獻帝起居注初平四年分漢
陽上郡爲永陽以鄉亭爲屬縣

注安陽侯王邑

安陽下當有亭字

注及給事黃門侍郎

黃門侍郎衛臻也

注魏遣郎中令少府博士御府乘黃底令

劉逵魏都賦注鄴城西下有乘黃廐宋書百官志乘黃令一人掌乘輿車及安車諸馬魏世置屬太常

注癸酉二貴人至洧倉中

水經洧水注洧水又東入汶倉城內俗以是水爲汶水故有汶倉之名非也蓋洧水之邸閣耳

注魏國二卿及侍中中郎二人與漢公卿並升殿宴

二卿卽郎中令少府也中郎虎賁中郎也續百官志虎賁中郎比六百石

三月

續五行志注引獻帝起居注曰夏四月旱

天子使魏公位在諸侯王上改授金璽赤紱遠遊冠

漢書百官公卿表諸侯王金璽續與服志諸侯王赤紱四采赤黃縹紺渚赤圭長二丈一尺三百首劉昭注引徐廣曰太子及諸王金印龜紐纁朱綬又曰云通天冠高九寸正豎頂少邪卻乃直下爲鐵卷梁前有山述展筭爲乘輿所常服遠遊冠制如通天有展筭橫之於前無山述諸王所服也一清案三者皆諸侯王之節曹公是時雖未膺王爵而已具其制

度矣

初隴西宋建自稱河首平漢王聚眾抱罕

河首地名也水經河水注引司馬彪曰西羌者自析支以西
濱於河首左右居續郡國志隴西郡抱罕故屬金城

漢皇后伏氏坐昔與父故屯騎校尉完書云帝以董承被誅怨
恨公辭甚醜惡發聞后廢黜死兄弟皆伏法

後漢書皇后紀獻帝伏皇后諱壽琅邪東武人大司徒湛之
八世孫也父完沈深有大度襲爵不其侯尙桓帝女陽安公
主爲侍中初平元年從大駕西遷長安后時入掖庭爲貴人
興平二年立爲皇后完遷執金吾建安元年拜完輔國將軍
儀比三司完以政在曹操自嫌尊戚乃上印綬拜中散大夫

尋遷屯騎校尉十四年卒子典嗣自帝都許守位而已宿衛
兵侍莫非曹氏黨舊姻戚議郎趙彥常爲帝陳言時策曹操
惡而殺之其餘內外多見誅戮董承女爲貴人操誅承而求
貴人殺之帝以貴人有妾累爲請不能得后自是懷懼乃與
父完書言曹操殘逼之狀令密圖之完不敢發至十九年事
乃露泄操大怒遂逼帝廢后以華歆爲鄉慮副收后下暴室
以幽崩所生二皇子皆醢殺之兄弟及宗族死者百餘人母
盈等十九人徙涿郡獻帝紀注引山陽公載記曰劉備在蜀
聞之遂發喪寰宇記卷七五女冢在許昌縣南二十里曹操
弑皇后伏氏並姊妹四人葬於此

注完及宗族死者數百人

完卒在十四年疑當作典字典完之子也或曰皇后紀兄弟及宋族死者百餘人此完字是兄之訛又脫弟字耳

天子命公置旄頭宮殿設鐘虓

續郡國志武都郡故道注引搜神記曰有怒特祠秦置旄頭騎起此宋書禮志晉武常問侍臣旄頭何義彭推對曰秦國有奇怪觸山截水無不崩潰唯畏旄頭故虎士服之秦制也張華曰有是言而事不經臣謂壯士之怒髮踊衝冠義取於此徐爰曰彭張之說各言意義無所承據案天文畢昴之中謂之天街故車駕以畢罕前引畢方昴員因其象星經昴一名旄頭故使執之者冠皮毛之冠也周頌有瞽之詩云設業設虓毛傳畫之植者爲虓爾雅釋器木謂之虓郭注縣鐘磬

之木植者名虞

二十年

陶弘景古今刀劍錄魏武以建安二十年於幽谷得一劍長三尺六寸上有金字銘曰孟德主常服之

天子立公中女爲皇后

後漢書皇后紀獻穆曹皇后諱節魏公曹操之中女也建安十八年操進三女憲節華爲夫人小者待年於國十九年並拜爲貴人及伏皇后被弑明年立節爲皇后魏受禪遣使求璽殺后怒不與如此數輩后乃呼使者入親數讓之以璽抵軒下因涕泣橫流曰天不祚爾左右皆莫能仰視后在位七年魏氏既立以后爲山陽公夫人自後四十一年魏景初元

年薨合葬禪陵車服禮儀皆依漢制

省雲中定襄五原朔方郡郡置一縣領其民合以爲新興郡

寰宇記卷四十九卷五十一漢末大亂匈奴侵邊自定襄以西雲中鴈門之間遂空曹公集荒郡之人立縣屬新興郡又卷四十一嵐州漢汾陽縣地漢末其地無郡邑曹魏遂立新興郡於此

夏四月公自陳倉以出散關至河池

漢書地理志右扶風陳倉武都郡河池水經渭水注渭水東入散關方輿紀要卷五十二散關在鳳翔府寶雞縣西南五十二里漢中府鳳縣東北百二十五里有大散嶺置關嶺上亦曰大散關爲秦蜀之襟喉

西平金城諸將麴演蒲石等共斬送韓遂首

後漢書董卓傳注引獻帝春秋曰梁州義從宋建王國等反詐金城郡降求見涼州大人故新安令邊允從事韓約不見大守陳懿勸之使見王國等便劫質約等數十人金城亂懿出國等扶以到護羌營殺之而釋約允等隴西以愛憎露布冠約允名以爲賊州購約允各千戶侯約允被購約改爲遂允改爲章

注會涼州宋楊北宮王等反

後漢書靈帝紀作北宮伯玉

注劉艾靈帝紀曰章一名元

元是允之譌

張魯使弟衛與將楊昂等據陽平關

水經沔水注沔水東逕白馬戍南湍水入焉水北發武都氏
中南逕張魯城東又南逕張魯治東對白馬城一名陽平關
方輿紀要卷五十六關在陝西寧羌州東北九十里亦曰陽
安關

復漢寧郡爲漢中分漢中之安陽西城爲西城郡

宋書州郡志漢中太守秦立建安二十年復漢寧郡爲漢中
疑是此前改漢中曰漢寧也張魯傳云漢末力不能征遂就
寵魯爲鎮民中郎將領漢寧太守方輿紀要卷五十六建安
六年分漢中之安陽置漢寧郡以張魯爲太守郡尋廢今陝
西興安州漢陰縣西二十里有安陽城漢縣治也一清案宋

書州郡志安康令二漢安陽縣屬漢中漢末省魏復立屬魏
興然則後漢書劉焉傳注引袁山松書曰建安二十年置漢
寧郡指此文而言是爲非也又方輿紀要卷五十六西城廢
縣在興安州西南三里漢置縣爲漢中郡治東漢移郡治南
鄭建安中置西城郡於此魏爲魏興郡

九月巴七姓夷王朴胡賓邑侯杜漢

孫盛曰朴音
梓漢音戶

舉巴夷賓民

來附

晉書李特載記張魯居漢中以鬼道教百姓賓人多往奉之
自巴西之宕渠遷於漢中楊車坂號爲楊車巴魏武帝尅漢
中特祖將五百餘家歸之魏拜爲將軍遷於略陽北土復號
之爲巴氏特父慕爲東羌獵將一清案魏都賦云賓幪積璫

琛階充叔卽指此

於是分巴郡以胡爲巴東太守濩爲巴西太守

魏之分邑但有虛名以羈縻屬夷耳

注孔衍漢魏春秋曰

隋書經籍志漢魏春秋九卷孔舒元撰卽衍也又孔衍有魏
尙書八卷裴注不引之

注斯則世祖神明

何云世字上宋本有出字

與舊列侯關內侯凡六等臣松之以爲今之虛封蓋自此始

續百官志關內侯承秦賜爵十九等爲關內侯無土寄食所
在縣民租多少各有戶數爲限注引如淳曰列侯出關就國

侯但爵身其有家累者與之關內之邑食其租稅也古今注
曰建武六年初令關內侯食邑者俸月二十五斛困學紀聞
卷十二案漢書樊噲傳賜爵封號賢成君顏注云楚漢之際
權設寵榮假其位號或得邑地或空受爵則虛封非始於建
安也太原閻氏若璩案杜佑於楚漢字上增戰國二字尤包
得全

注是行也侍中王粲作五言詩以美其事曰

仲宣從軍詩五首卽此篇尙有夫十二句云晝日處大朝日
暮薄言歸外參時明政內不廢家私禽獸憚爲犧良苗實已
揮不能效沮溺相隨把鋤犁熟覽夫子詩信知所言非竊慕
負鼎翁願厲朽鈍姿世期但割取前半篇以入注耳

注魏書曰有司奏四時講武於農隙

於字上宋書禮志有皆字

注唯十月都試車馬幸長水南門

水經渭水注長安城十二門南出東頭第二門本名安門亦曰鼎路門史記音義文帝出安門注云在霸陵縣有安門故亭卽郡國志所謂長門亭也史記曰霸漚長水也

夏五月

續五行志五月己亥朔日有蝕之注引潛潭巴曰己亥蝕小人用事君子繫

注庶姓之與親

親上當有宗字

注將何以荅神祇慰萬民哉

何云萬民宋本作萬方

注四體書勢序曰梁鵠以公爲北部尉

續百官志注引漢官曰洛陽孝廉左右二尉蓋時以孝廉爲
郎者居之曹公舉孝廉爲議郎正當作尉書勢序以爲求爲
令非也求爲令見十三年注

秋七月匈奴南單于呼厨泉將其名王來朝待以客禮遂留魏
使右賢王去卑監其國

後漢書南匈奴傳單于於扶羅立七年死弟呼厨泉立以兄
被逐不得歸國數爲鮮卑所鈔建安元年獻帝自長安東歸
右賢王去卑與白波賊帥韓暹等侍衛天子拒擊李傕郭汜

各車駕還洛陽又從遷許然後歸國二十一年單于來朝曹操因留於鄴而遣去卑歸監其國焉注曰呼厨泉卽劉元海之叔祖

冬十月治兵

方輿紀要卷四十九講武城在河南彰德府臨漳縣故鄴城北漳水上磁州南二十里亦有講武城皆曹操所築也

遂征孫權

文選阮瑀爲曹公作書與孫權當在此時

王軍居巢

續郡國志廬江郡居巢注引廣志曰有两大湖方輿紀要卷二十六巢湖在廬州府東五十里建安中曹操數與孫氏爭

衡於此諸葛武侯所謂四越巢湖不成者也一清案四越一在十四年一在十八年一在十九年并此爲四而吳遂外託稱臣得肆意取荊州矣

二月

續禮儀志注引獻帝起居注曰二月壬申詔書絕立春寬綏詔書不復行

權在濡須口築城拒守遂逼攻之權退走

文選陳琳爲魏武檄吳將校部曲云年月朔甲子尙書令彧告江東諸將校部曲及孫權宗親中外卽在此時

夏四月天子命王設天子旌旗出入稱警蹕

宋書禮志曰後漢祠天郊用法駕祠宗廟用小駕小駕減損

副車也前驅有九旂雲罕皮軒鸞旂車皆大夫載之鸞旂者
編羽毛列繫幢旁也金鉦黃鉞黃門鼓車乘輿之後有屬車
尙書御史載之最後一車懸豹尾豹尾以前比於省中每出
警蹕清道建五旗太僕奉駕條上鹵簿尙書郎侍御史令史
皆執注以督整車騎所謂護駕也五旗者五色各一旗以木
牛乘其下五旗纒竿卽禮記德車結旌不盡飾也戎事乃散
之又武車綏旌垂舒之也漢儀曰出稱警入稱蹕說者云車
駕出則應稱警入則應稱蹕也而今俱唱之史臣以爲警者
警戒也蹕者止行也今從乘輿而出者並警戒以備非常也
從外而入與乘輿相干者蹕而止之也董巴司馬彪云諸侯
王遮遯出入稱警設蹕續漢書輿服志曰天子建太常十有

二旂九仞曳地日月升龍象天明也劉昭注引鄭眾曰太常九旗之畫日月者鄭玄曰七尺爲仞天子之旗高六丈三尺一清案續輿服志云諸侯王遮遶出入稱謁促則知警蹕爲非常之典

五月作泮宮

宋書禮志云作泮宮於鄴城南

注魏書曰初置衛尉官

合前歲所置二卿於是九卿官備與朝家相埒矣

冬十月

後漢書獻帝紀二十二年冬有星孛於東北是歲大疫五行志注引魏文帝書與吳質曰昔年疾疫親故多離其災陳思

王嘗說疫氣云家家有殭尸之痛室室有號泣之哀或闔門而殮或舉族而喪者一清案二十三年注疫癘在冬操是以有廩貸復家之令

天子命王冕十有二旒乘金根車駕六馬設五時副車

續輿服志冕冠垂旒前後遂延玉藻明帝永平二年詔有司采周官禮記尙書皋陶篇乘輿服從歐陽氏說冕皆廣七寸長尺二寸前圓後方朱緣裏玄上前垂四寸後垂三寸係白玉珠爲十二旒以其綬采色爲組纓又殷璠山車金根之色漢承秦制御爲乘輿所謂孔子乘殷之輅者也乘輿金根安車立車輪皆朱班重耳貳轂兩轄金薄繆龍爲輿倚較文虎伏軾龍首銜輓左右吉陽節鸞雀立衡樞文畫轡羽蓋華

瑤建大旂十二旂畫日月升龍駕六馬象鑣鏤錫金鍔方鉞
插翟尾朱兼樊纓赤屬易甘金就十有二左肅以羴牛尾爲
之在左駢馬輓上大如斗是爲德車五時車安立亦皆如之
各如方色馬亦如之白馬者朱其髦尾爲朱鬣云所御駕六
餘皆駕四後從爲副車宋書禮志秦獨取殷制古曰桑根車
秦曰金根車應劭漢官鹵簿圖乘輿大駕則御鳳凰車以金
根爲副又五色安車五色立車名五乘建龍旂駕四馬施八
轡餘如金根之制其車各如方色所謂五時副車俗謂五帝
車也又宋書禮志魏晉之制太子諸王公駕四今駕六馬則
純平帝制矣

劉備遣張飛馬超吳蘭等屯下辯

下辯屬武都郡後漢移郡治焉亦謂之武街城水經漾水注云武街城下辯縣治也卽今陝西成縣

二十三年

晉書五行志建安二十三年雋鸞鳥集鄴宮文昌殿後池明年魏武王薨

春正月漢太醫令吉本

續百官志太醫令一人六百石本注曰掌諸醫一清案續漢書耿秉傳作吉平注或作平則本字誤也

與少府耿紀司馬韋晃等反

耿秉傳曾孫紀以操將篡漢與太醫令吉平丞相司直單汎晃睢謀起兵誅操不克夷三族

注三輔決錄注曰

隋書經籍志三輔決錄七卷漢太僕趙岐撰摯虞注

注時有京兆金禕字德禕

禕父旋見蜀先主傳注

注又與王必善因以聞之

何云問宋本作問

注王曰必欲投禕

王字當作或

三月

續天文志三月孛星晨見東方二十餘日夕出西方犯歷五車東井五諸侯文昌軒轅后如太微鋒炎指帝坐占曰除舊

布新之象也

陰平氏強端斬吳蘭

方輿紀要五十九武帝開西南夷置陰平道屬廣漢郡犍郡
國志安帝改爲廣漢屬國

其規西南豹祠西原上爲壽陵因高爲基不封不樹

水經濁漳水注漳水自西門豹祠北逕趙閼馬臺西又北逕
祭陌西戰國之世俗巫爲河伯取婦祭于此陌西門豹爲鄴
令投巫河中淫祀雖斷地畱祭陌之稱焉

冬十月宛守將侯音等反

犍郡國志南陽郡治宛

注於是執太守東里褒

何云袞當作袞從三少帝紀校

注南陽功曹宗子卿

高貴卿公甘露三年袞卹詔高陽功曹是應余

三月王自長安出斜谷軍遮要以臨漢中

續郡國志石扶風武功有斜谷注引西征賦注曰袞斜谷在長安西南南口袞北口斜長百七十里其水南流漢書地理志謂斜水袞水出衙領山也又胡三省通鑑注曰遮要謂以軍遮其要害處或云是地名方輿紀要卷五十六陝西漢中府北七十里有曹操城蜀先生取漢中操馳救軍遮要以臨漢中卽此城也

八月漢水溢

續五行志八月漢水溢流害民人注引袁山松書曰明年禪位于魏

注又與長樂衛尉陳祿謀襲鄴

漢書百官公卿表長樂建章甘泉衛尉皆掌其宮續百官志其中長信長樂宮者署少府一人及餘吏皆以宮名爲號長樂又有衛尉僕爲太僕皆二千石在少府上

冬十月軍還洛陽

何云陸機弔魏武帝文云當建安之三八實大命之所艱雖光昭于曩載將稅駕於此年憤西夏以鞠旅泝秦川而舉旗踰鎬京而不豫臨渭濱而有疑冀翌日之云瘳彌四旬而成災詠歸塗以反旆登淆澠而竭來次洛汭而大漸指六軍曰

念哉觀此則操實以西行不得志而發病及襄樊圍急狼狽還救耳纂嚴洛汭獲考牘下固已偃息不遑登頓而死史不盡書當以武侯正議參證之

王軍摩陂

方輿紀要卷五十一摩陂在河南汝州郝縣南汝水支流所匯也青龍中改名龍陂

庚子王崩於洛陽年六十六遺令曰

文選陸機弔魏武帝文曰元康八年機始以臺郎出補著作游乎祕閣而見魏武帝遺令愀然歎息傷懷者久之今攷遺令具載機序文繁不備錄

未得遵古也葬畢皆除服

未得遵古下宋志載遺令有百官臨殿中者十五舉音一句
歛以時服無藏金玉珍寶

孫能傳剡溪漫筆云司馬溫公語劉元城昨看三國志識破
一事曹操身後事孰有大於禪代遺令諄諄百言下至分香
賣履家人婢妾無不處置詳盡而無一語及禪代事是實以
天子遺子孫而身享漢臣之名操心直爲溫公剖出今魏志
所載遺令寥寥數語其分香賣履處置家人婢妾皆無之裴
松之注亦不載豈所見有別本耶宋書禮志魏武以送終制
衣服四篋題識其上春秋冬夏日有不諱隨時以歛金珥球
玉銅鐵之物一不得送文帝遵奉無所增加及受禪刻金璽
追加尊號不敢開塋乃爲石室藏璽塋首示陵中無金銀諸

物也漢禮朋器甚多自是皆省矣

二月丁卯葬高陵

元和郡縣志魏武帝四陵在鄴縣西三十里楊奐山陵雜記
曹操沒後恐人發其冢乃設疑冢七十二在漳河之上方輿
紀要卷四十九操有疑冢凡七十二處在漳水上自講武城
外森然彌望高者如小山布列直至磁州而止

注自作兵書十萬餘言

隋書經籍志續孫子兵法二卷魏武帝撰又魏武帝兵法一
卷

注難眩以僞

何云以操之難眩以僞而猶有孔珪之事

注御軍三十餘年手不捨書晝則講武策夜則思經傳

隋書經籍志魏武帝集二十六卷梁三十卷錄一卷梁又有
武皇帝逸集十卷又魏武帝集新選十卷

注及造作宮室繕制器械無不爲之法則皆盡其意

崔豹古今注魏武帝以瑪瑙石爲馬勒車牒爲酒椀虔荔鼎
錄魏武帝鑄一鼎於白鹿山高一丈紀征伐戰陣之能古文
篆書四足更作鼎與太子名曰孝鼎盡刻古來孝子姓名小
篆書硯北雜志曹公作欹案臥視讀書中華古今注軍帳魏
武所制以軍中服之輕便又作五色幟以表方面也博物志
漢中興士人皆冠葛巾建安中魏武造白帟於是遂廢唯二
學書生猶著也晉書五行志初魏造白帟橫縫其前以別後

名之曰顏哈傳行之至永嘉之間稍去其縫名無顏哈

注又好養性法

太霄經魏武帝爲九州置壇度道士三十五人文帝幸雍謁
陳熾法師置道士五十人

注是以袁紹崔豹之徒

何云崔豹當作崔鈞見後漢書崔駰傳及宋書禮志

注及故人舊怨亦皆無餘

世說劉峻注引楚國先賢傳宗承字世林南陽安人父資
有美譽承少而脩德雅正確然不羣徵聘不就聞德而至者
如林魏武弱冠屢造其門值賓客猥積不能得言乃伺承起
往要之捉手請交承拒而不納帝後爲司空輔漢朝乃謂承

曰卿昔不顧吾今可爲交未承曰松栢之志猶存帝不悅以其名賢猶敬禮之敕文帝脩子弟禮就家拜漢中太守武帝平冀州從至鄴陳羣等皆爲之拜帝猶以舊情介意薄其位而優其禮就家訪以朝政居賓客之右文帝徵爲直諫大夫明帝欲引以爲相以老固辭

注及在兗州陳畱邊讓言議頗侵太祖太祖殺讓族其家

後漢書文苑傳讓字文禮陳畱浚儀人以高才擢進屢遷出爲九江太守初平中去官歸家恃才氣不屈曹操多輕侮之言建安中其鄉人有講讓於操操告郡就殺之

注其酷虐變詐皆此類也

世說魏武行役失汲道軍皆渴乃令曰前有大梅林饒子甘

釀可以解渴士卒聞之口皆出水乘此得及前源又嘗言人欲危已輒心動因語所親小人曰汝懷刃密來我側我必說心動執汝使行刑汝但勿言其使無他當厚相報執者信焉不以爲懼遂斬之此人至死不知也左右以爲實謀逆者氣挫矣又常云我眠中不可妄近近便所人亦不自覺左右宜深慎此後陽眠所幸一人竊以被覆之因便所殺自爾每眠左右莫敢近者又曰魏武有一伎聲最清高而性情酷惡欲殺則愛才欲置則不堪于是選百人一時俱教少時果有一人聲及之便殺惡性者

三國志注補卷一

宿松羅忠濟初校

黟縣黃士陵覆校

陽湖吳翊寅再覆校